

Daging rusa, kambing di Ekspo Pertanian UPM

KUALA LUMPUR 23 Okt. - Pelbagai produk pertanian dan ternakan berkualiti boleh diperolehi orang ramai di Ekspo Pertanian Universiti Putra Malaysia (UPM) sempena Pesta Konvo UPM Ke-41 yang bermula pada 3 hingga 8 November depan.

Bahagian Taman Pertanian Universiti UPM melalui satu kenyataan berkata, sepanjang ekspo berlangsung pelbagai produk seperti daging kambing dan rusa termasuk susu lembu berkualiti tinggi akan dijual pada harga

berpatutan.

Menurutnya, walau bagaimanapun bekalan daging rusa dan kambing yang dijual itu bergantung kepada stok yang terhad yang ditenak pihak universiti sendiri.

“Pameran Ternakan atau ‘mini zoo’ turut berlangsung di tapak ekspo itu nanti yang akan memamerkan haiwan ternakan antaranya rusa baka *Cervus-timorensis* yang boleh mencapai berat sehingga 80 ke 100 kilogram.

“Fokus pameran merangkumi

penjagaan rusa ternakan serta ciri-ciri haiwan itu termasuk pengetahuan berhubung habitat dan pembiakan selain pengunjung turut berpeluang memberi makan dan bergambar bersamanya,” menurut kenyataan itu di sini hari ini.

Selain itu, turut dijadualkan sepanjang ekspo berlangsung sesi bersama pakar rujuk haiwan kesayangan dan haiwan ternakan selama dua hari pada 4 dan 5 November bermula pukul 9 pagi hingga 12 tengah hari secara percuma.



PENGUNJUNG berpeluang memberi makan dan bergambar bersama rusa baka *Cervus-timorensis* sepanjang Ekspo Pertanian Universiti Putra Malaysia bermula pada 3 hingga 8 November depan.